

ARTISTA BUCHI BOEKHOUDT LO SER HONRA

ORANJESTAD (AAN): Buchi Boekhoudt ta un artista cu a dedica su bida na musica. Cu edad joven di 12 aña, el a cuminsa toca caba. E tabata domina guitarra, violon, y tur e drumnan di steelband.

Tambe Buchi ta prepara y stem e barinan di steelband, pues e steelpannan. Hopi alumno di Buchi a duna les den diferente instrumento. Awe hopi musico ta gradecido cu e ayudo di Buchi.

Buchi semper tabata tin hopi interes den Caha di Or-

gel, y desde mucha ora tabata tin fiesta, e ta bay scucha.

Y poco-poco el a cuminsa siña riba su mes, sin ayudo di ningun hende, e arte dificil pero bunita di pone clabo riba cilindro, popularmente conoci como "claba cilindro".

Awe Buchi ta e unico cu ta claba cilindro cu perfeccion na Aruba, pero tambe na Antillas. Buchi ta claba cilindro pa mayoria di cahanan tanto na Aruba como na Curaçao.

E proceso di claba cilindro

ta consisti di scucha e musica bon prome, despues skirbi e musica completo, pues e melodía y e acompañamento. Despues ta marke riba e cilindro y clabe. Ta toke y si tin error, ta coregi esaki y e ora tur cos ta cla, e caha por worde toca.

Awor directiva di Promoción Cultura Arubano ta honra Alfonso "Buchi" Boekhoudt pa tur su aportenan na cultura musical, deidando Premio Motito y Rufo Wever na su persona.